

史  
通  
訓  
故

史通訓故卷之三

表曆第七

蓋譜之建名起於周氏表之所作因譜象形故桓君山有云太史公三代世表旁行斜上並效周譜此其證歟夫以表爲文用述時事施彼譜曆容或可取載諸史傳未見其宜何則易以六爻窮變化經以一字成褒貶傳包五始詩含六義故知文尚簡要語惡煩蕪何必款曲重沓方稱周備觀馬遷史記則不然矣天子有本紀諸侯有世家公卿已下有列傳至於祖孫昭穆年月職官各在其篇具有其說用相考覈居

然可知、而重列之以表成其煩費、豈非謬乎、且表次在篇第、編諸卷軸、得之不爲益、失之不爲損、用使讀者、莫不先看本紀、越至世家、表在乎其間、緘而不視、語其無用、可勝道哉、既而班東二史、東謂東觀漢史各相祖述、迷而不悟、無異逐狂、必曲爲銓擇、強加引進、則列國年表、或可存焉、何者、當春秋戰國之時、天下無主、群雄錯峙、各自年世、若申之於表、以統其時、則諸國分年、一時盡見、如兩漢御曆、四海成家、公卿既爲臣子、王侯才比郡縣、何用表其年數、以別於天子者哉、又有甚於斯者、異哉班氏之人表也、區別九品、網羅

千載論世則異時語姓則它族自可方以類聚物以  
群分使善惡相從先後爲次何籍而爲表乎且其書  
上自庖犧下窮嬴氏不言漢事而編入漢書鳩居鵲  
巢燕施松上附生疣贅不知剪裁何斷而爲限乎至  
法盛書載中興改表爲注名目雖巧燕累亦多當晉  
氏播遷南據揚越魏宗勃起北雄燕代其間諸僞十  
有六家不附正朔自相君臣一作長崔鴻著表頗有甄  
明比於史漢群篇其要爲切者矣若諸子小說編年  
雜記如常昭洞紀陶弘景帝王歷皆因表而作用成  
其書既非國史之流故存而不述

校四字

後漢書桓譚字君山沛國相人爲議郎出爲六安丞著新論

前漢書注元者氣之始春者時之始王者受命之始正月者政教之始即位者一國之始

詩維鵲維鵲有巢維鳩居之  
詩頍弁鳶與女蘿施于松柏

南史徐廣傳時有高平郗紹亦作晉中興書數以示何法盛盛有意圖之謂紹曰卿名位貴達不復俟此延譽我寒士無聞賴有著述流聲于後宜以爲惠紹不與書成在齋內厨中法盛詣紹紹不在

直入竊書紹歸無復兼本於是遂行何書

北史崔鴻字彥鸞清河人鴻弱冠有著述志見晉

魏諸史皆成一家無所措意乃以劉元海慕容皝

苻健慕容皝垂姚萇慕容德赫連屈于張軌李雄呂

光乞伏國仁禿髮烏孤李嵩沮渠蒙遜馮跋等各

有國書未有統一乃撰爲十六國春秋因其舊記

時有增損褒貶焉

吳志常昭作洞紀自庖羲至秦漢凡三卷

梁書陶洪景秣陵人齊高帝引爲諸王侍讀永明十年辭祿止句曲山自號華陽隱居著帝代年歷

書志第八

并序  
五行志

天文志  
雜志

藝文志

夫刑法禮樂風土山川求諸文籍出於三禮及班馬著史別裁書志考其所記多效禮經且紀傳之外有所不盡隻事片文於斯備錄語其通博信作者之淵海也原夫司馬遷曰書班固曰志東觀曰記華嶠曰典張勃曰錄何法盛曰說名目雖異體統不殊亦猶楚謂檣杪晉謂之乘魯謂之春秋其義一也於其編次則有前曰平堆後云食貨古號河渠今稱溝洫析郊祀爲宗廟分禮樂爲威儀懸象出於天文郡國生於地理如斯變革不可勝計或名非而物是或小異

而大同、但作者愛奇、耻於仍舊、必尋源討本、其歸一  
揆也。若乃五行藝文、班補子長之闕、百官輿服、謝拾  
孟堅之遺、王隱後來、加以瑞異、魏收晚進、弘以釋老、  
斯則自我作故、出乎胷臆、求諸歷代、不過一二者焉。  
大抵志之爲篇、其流十五六家而已、其間則有妄入  
編次、虛張部帙、而積習已久、不悟其非、亦有事應可  
書、宜別標題、而古來作者、曾未覺察、今畧陳其義、列  
於下云。

已上書志序

校二字

天文志

夫兩曜百星麗於玄象、非如九州萬國、廢置無恒、故海田可變、而景緯無易、古之天猶今之天也、今之天即古之天也、必欲刊之國史、施於何代、不可也、但史記包括所及、區域綿長、故書有天官、讀者竟忘其誤、推而爲論、未見其宜、班固因循、復以天文作志、志無漢事、而隸入漢書、尋篇考限、覩其垂越者矣、降及有晉、迄于隋氏、或地止一隅、或年才二世、而彼蒼列志、其篇倍多、流宕忘歸、不知紀極、方於漢史、又孟堅之罪人也、竊以國史所書、宜述當時之事、必爲志而論

天象也。但載其時彗字氛祲薄食晦明禪竈梓慎之所占、京房李邵之所候、至如熒惑退舍、宋公延齡中台告折、晉相速禍、星集潁川、而賢人聚月犯少微而處士亡、如斯之類、志之可也。若乃體分濛濛、色著蒼蒼、丹曦素魄之躔、次黃道紫宮之分野、既不預於人事、輒編之於策書、故曰刊之國史、施於何代、不可也。其間唯有袁山崧、沈約、蕭子顯、魏收等數家、頗覺其非、不遵舊例。凡所記錄、多合事宜、寸有所長、賢於班馬遠矣。

校五字

春秋左傳昭公十年有星出于婺女、鄭裨灶言于子產曰七月戊子晉君將死、今茲歲在潁、潁之墟。

姜氏任氏實守其地居其維首而有妖星焉告邑姜也邑姜晉之妣也天以七紀戊子逢公以登星斯于是乎出吾是以譏之

春秋左傳昭公十七年冬有星孛于大辰西及漢梓慎曰往年吾見之是其徵也火出而見今茲火出而章必火入而伏其居火也久矣若火作則四國當之其宋衛陳鄭乎

前漢書京房字君明東郡頓丘人事梁人焦延壽延壽之說長於災變分六十四卦更直日用事以風雨寒溫爲候各有占驗房用之尤精

後漢書李郃字孟節南鄭人善河圖風星和帝時分遣使者微服觀風二人到益部投郃候舍時夏夕露坐郃因仰觀問曰二君發京師時寧知朝廷遣二使耶二人默然驚相視曰何以知之郃指星

示曰有二使星向益州分野故知之耳

淮南子道應訓宋景公之時熒惑守心子韋曰心宋之分野也禍且當君雖然可移于相公曰相所與治國家也而移死焉不祥曰可移于民公曰民死寡人將誰爲君曰可移于歲公曰歲饑民死爲人后而殺其民誰以爲君子韋曰天處高而听卑

君有君人之言三天必三賞災惑必徙三舍君延年二十一矣候之果徙三舍

晉書張華字茂先范陽人以平吳功封廣武公初華舍及監省數有恠少子躋以中台星圻勸華遜位華曰天道玄遠不如靜以待之及趙王倫謀廢賈后使司馬雅告華華距之遂被害

世說穎川陳太丘詣荀朗陵元方將車季方持杖後從長文尚小載着車中既至叔慈應門慈明行酒文若亦小坐着膝前于時太史奏真人東行異苑云于時德星聚太史奏五百里內有賢人聚晉陽秋謝敷字慶緒隱若耶山初月犯少微少微一名處上星占者以隱士當之時譙國戴逵名重于敷人或憂之俄而敷死晉書袁山松陽夏人喬之孫也歷吳郡太守少有才名著後漢書

# 藝文志

伏羲已降、文籍始備、逮於戰國、其書五車、傳之無窮、是曰不朽、夫古之所制、我有何力、而班漢定其流別、編爲藝文志、論其妄載事等上篇、謂天文志續漢已還祖

述不暇、夫前志已錄、而後志仍書篇目如舊、頻煩互出、何異以水濟水、誰能飲之者乎、且漢書之志、天文藝文也、蓋欲廣列篇名、示存書體而已、文字既小、披閱易周、故雖垂節文而未甚穢累、既而後來繼述其流日廣、天文則星占月會、渾圖周髀之流、藝文則四部七錄、中經秘閣之輩、莫不各踰三篋、自成一家史

臣所書宜其輟簡而近世有著隋書者乃廣包衆作  
勒成二志騁其繁富百倍前脩非唯循覆車而重軌  
亦復加闊眉以半額者矣但自史之立志非復一門  
其理有不安多從沿革唯藝文一體古今是同詳求  
厥義未見其可愚謂凡撰志者宜除此篇必不能去  
當變其體近者宋孝王關東風俗傳亦有墳籍志其  
所錄皆鄴下文儒之士讐校之司所列書名唯取當  
時撰者習茲楷則庶免譏嫌語曰雖有絲麻無棄菅  
蒯於宋生得之矣

校二字

文獻通考周髀一卷天文書也稱周公受之商高  
而以勾股爲術故曰周髀

隋書經籍志魏氏代漢采掇遺亡藏在秘書魏秘書郎鄭默始制中經至荀勗因中經分爲四部一曰甲部紀六藝及小學等書二曰乙部古今子家及兵家術數三曰景部史記舊事皇覽簿雜事四曰丁部有詩賦圖讚汲冢書梁普通中處士阮孝緒博采宋齊以來王公之家凡有書記叅校官簿更爲七錄一曰經典錄二曰記傳錄三曰子兵錄四曰文集錄五曰伎術錄六曰佛錄七曰道錄北史宋隱傳道璵孫孝王爲北平王文學求入文林館不遂因非毀朝士撰朝士別錄二十卷會周武滅齊改爲關東風俗傳更廣聞見成三十卷

## 五行志

夫灾祥之作、以表吉凶、此理昭昭、不易誣也。然則麒麟闕而日月蝕、鯨鯢死而彗星出、河變應於千年、山崩由於朽壤。又語曰：太歲在丑、乞漿得酒；太歲在巳、販妻鬻子。則知吉凶遞代、如盈縮循環。此乃關諸天道、不復繫乎人事。且周王決疑、龜焦著折；宋皇誓衆、竿壞幡亡。梟止涼師之營、鵬集賈生之舍。斯皆妖災著象、而福祿來鍾。愚智不能知、晦明莫之測也。然而古之國史、聞異則書、未必皆審其休咎、詳其美惡也。故諸侯相赴、有異不爲災、見於春秋。其事非一、洎漢

興儒者、乃考洪範、以釋陰陽其事也。如江璧傳於鄭  
客、遠應始皇、卧柳植於上林、近符宣帝、門樞白髮、元  
后之祥、桂樹黃雀、新都之識、舉夫一二、良有可稱。至  
於蜚蜮、蜃蝻、蠹食崩拆、隕霜雨雹、大水無水、其所證  
明、實皆迂闊。故當春秋之世、其在於魯也、如有旱雩  
舛候、螟螣傷苗之屬、是時或秦人歸襚、或毛伯賜命、  
或滕邾入朝、或晉楚來聘、皆持此恒事、應彼咎徵、旻  
穹垂謫、厥罰安在、探賾索隱、其可畧諸。且史之記載、  
難以周悉、近者宋氏年唯五紀、地止江淮、書滿百篇、  
號爲繁富、作者猶廣之以拾遺、加之以語錄、況彼春

秋之所記也二百四十年行事夷夏之國盡書而經

傳集解卷才三十則知其所畧盖亦多矣而漢代儒

者羅災青於二百年外討符會於三十卷中安知事

有不應於人應人而失其事何得苟有變而必知其

兆者哉若乃採前文而改易其說謂王札子之作亂

在彼成年春秋成元年二月無冰董仲舒以為其時王札子殺召伯毛伯案今春秋經札子殺

召毛事在宣十五年非成公時夏徵舒之搆逆當夫昭代春秋昭公九年陳火

董仲舒以為楚嚴王為陳討夏徵舒因滅陳陳之臣

子毒恨故致火災案楚嚴王之滅陳在宣十一年如

昭九年所滅者乃楚靈王時且莊王卒恭王立恭王

卒康王立康王卒夾敖立夾敖卒靈王立相去凡五

世在五行志上卷中楚嚴作霸荆國始僭稱王春秋桓公三年日有蝕之既京

房易傳以爲楚嚴稱王兼地千里案自武王始僭號歷定成繆三王始至於嚴然則楚之稱王已四世矣行得言嚴始稱哉又魯桓薨後世歷嚴閔釐文宣凡五君而楚嚴作霸安有桓三年日食而應之邪高

宗諒陰亳都實生桑穀

尚書伊陟相太戊亳有桑穀共生劉向以爲殷道衰高宗

承弊而起盡諒陰之秉天下應之既獲顯榮怠於政事而國將危亡故桑穀之異見按大戊崩其後嗣有仲丁河亶甲祖乙盤庚凡歷五世始至武丁即高宗是也桑穀自大戊時生非高宗事高又本不都於亳

晉悼臨國六卿專政以君事臣

董仲舒以爲成公十七年六月甲戌朔日

有食之時宿在畢晉家象也晉厲公後莫敢責大夫六卿遂相與比周專晉國君還事之按春秋成公十二年丁巳朔日魯僖末年三桓世官殺嫡立庶

春秋傳公

三十年十二月隕霜不殺草劉向以爲是時公子遂專權三桓始世官向又曰嗣君微失柄來事之象也又釐公二十九年秋大雨雹劉向以爲釐公末年信

用公子遂專權自恣至於殺君故陰脅陽之象見釐

公不悟遂終專權後二年殺子赤立宣公按此事乃  
文公未出不足僖公時也遂即東門襄仲赤文公太  
惡也斯皆不憑章句直取胃懷或以前為後以虛為

實移的就箭曲取相諧掩耳盜鍾自云無覺詎知後

生可畏來者難誣者邪又品藻群流題目庶類謂莒

為大國菽為強草鶯著素一作青色負蟠匪中國之虫

春秋嚴公二十九年有蜚劉歆以為蜚負蟠也劉向  
以為非中國所有南越盛暑男女同川浴淫風所生  
是時嚴取齊淫女為夫人既入淫於兩叔鸛鵒為夷  
故蜚至按負蟠中國所生不獨出南越

狄之鳥春秋昭公十三年鸛鵒來巢劉向以為夷  
狄之禽按鸛鵒中國皆有唯不踰濟水耳事

見周如斯詭妄不可殫論而班固就加纂次曾靡銓

擇因以五行編而為志不亦惑乎且每有敘一災推

一恠董京之說前後相反

恒公三年日有食之董仲舒劉向以爲魯宋殺君易

許田劉歆以爲晉曲沃莊伯殺晉侯京房以爲後楚嚴稱王兼地千里也

向歆之解父子

不同

嚴公七年夜中星隕如雨劉向以爲夜中者即中國也劉歆以爲晝象中國夜象夷狄劉向又

以爲域生南越劉歆以爲盛暑所生非自越來也

遂乃雙載其文兩存厥理

言無堆的事益煩費豈所謂撮其機要收彼菁華者

乎自漢中興已還迄于宋齊其間司馬彪臧榮緒沈

約蕭子顯相承載筆競志五行雖未能盡善而大較

多實何者如彪之徒皆自以名慙漢儒才劣班史凡

所辨論務守常途既動遵繩墨故理絕河漢兼以古

書從畧求徵應者難該近史尚繁考祥符者易洽此

昔人所以言有乖越後進所以事反精審也然則天

道遼遠裨竈焉知日蝕不常文伯所對至如梓慎之

占星象趙達之明風角單颺識魏祚於黃龍董養徵

晉亂於蒼鵠斯皆肇彰先覺取驗將來言必有中語

無虛發苟誌諸竹帛其誰曰不然若乃前事已往後

來追證課彼虛說成此有詞多見其老生常談徒煩

翰墨者矣予曰盖有不知而作之者我無是也

包曰時人

有穿鑿妄作篇籍者故云然又曰君子於其所不知盖闕如也又

曰知之爲知不知爲不知是知也嗚呼世之作者其

鑒之哉談何容易駟不及舌無爲強著一言受嗤千

載也

校二十五字

淮南天文訓虎嘯而谷風至龍舉而景雲屬麒麟  
闕而日月蝕鯨魚死而彗星出

王予年拾遺記冊丘千年一燒黃河千年一清皆  
至聖之君以爲大瑞

春秋左傳成公五年晉梁山崩召伯宗伯宗辟重  
重人曰待我不如捷之速也問其所曰絳人也問  
絳事焉曰梁山崩將召伯宗謀之問將若之何曰  
山有朽壤而崩可若何

宋書武帝征盧循至左里將戰所執麾竿折旛沉  
于水衆懼帝笑曰往年覆舟之戰旛竿亦折今茲  
復然賊必破矣即攻柵而進大敗之

晉書西涼張重華時石季龍使王擢麻秋等侵寇  
重華以謝艾爲中堅將軍擊之師出振武夜二梟  
鳴牙中艾曰六博得梟者勝此克敵之兆也進戰  
大破之

前漢書賈誼爲長沙王傳有鵬飛入誼舍誼既以  
謫居長沙長沙卑濕誼自傷悼以爲壽不得長乃  
爲賦以自廣

前漢書五行志始皇三十六年鄭客從關東來見素車白馬從華山上下持璧與客曰爲我遺鍋池君因言今年祖龍死鄭客奉璧卽二十八年過江所湛壁也

前漢書五行志昭帝時上林苑柳樹斷一朝起立生枝葉有虫食其葉成文字曰公孫病已立宣帝本名病已將膺大位之徵

前漢書五行志哀帝建平四年京師郡國民聚會里巷設祭祠西王母又傳書曰母告百姓佩此書不死不信視門樞下當有白髮杜鄴以爲丁傳用事一曰丁傳所亂者小此異乃王太后莽之應前漢書五行志成帝時童謠曰邪徑敗良田讒口亂善人挂樹華不實黃雀巢其巔故爲人所羨今爲人所憐挂赤色漢家象華不實無繼嗣也王莽自謂黃象黃雀巢其巔也

宋書高祖以永初元年庚申受禪至順帝昇明三年已未禪于齊凡六十年

通志宋拾遺十卷梁少府卿謝綽撰宋齊語錄十卷孔思尚撰

春秋左傳昭公十八年星孛于大辰禪灶曰宋衛

陳鄭將同日火若我用瓘牟王璜鄭必不火子產弗與已而四國皆火裨灶曰不用吾言鄭又將火鄭人請用之子產曰天道遠人道邇非所及也灶焉知天道

春秋左傳昭公七年夏四月日有食之晉侯問于士文伯曰誰將當日日食曰魯衛惡之十一月季武子卒晉侯謂伯瑕曰吾所問日食從矣可常乎對曰不可六物不同民心不一同始異終胡可常也吳志趙達河南人治九宮一筭之術究其微旨孫權行師征伐每令達有所推步皆如其言

後漢書單颺字武宣山陽人初熹平末黃龍見譙橋玄問颺颺曰其國當有王者興不及五十年龍當復見此其應也魏郡人殷登密記之至建安二十五年黃龍復見其冬魏受禪

晉書董養字仲道太始初到洛下永嘉中洛陽東北步廣里地陷有蒼白二鵝出蒼者飛去白者不能飛養聞嘆曰昔周時所盟會狄泉即此地也蒼爲胡象白者國家之象其可言乎尋有劉石之亂

雜志

或以爲天文藝文、雖非漢書所宜取、而有廣聞見、難爲刪削也。對曰、苟事非其限、而越理來書、自可觸類而長。于何不錄、又有要於此者、今可得而言焉。夫圓首方趾、含靈受氣、吉凶形於相貌、貴賤彰於骨法、生人之所欲知也。四支六腑、痾瘵所纏、苟詳其孔穴、則砭灼無誤、此養生之先急也。且身名並列、親踈自明、豈可近昧形骸、而遠求辰象、旣天文有志、何不爲人形志乎。茫茫九州、言語各異、大漢輶軒之使、譯導而通、足以驗風俗之不同、示皇威之廣被、且事當災運、

尤相關涉、爾雅釋物、非無往例、既藝文有志、何不爲方言志乎、但班固綴孫卿之詞、以序刑法、探孟軻之語、用裁食貨、五行出劉向、洪範藝文取劉歆、七畧因人成事、其目遂多、至若許負相經、揚雄方言、並當時所重、見傳流俗、若加以二志、幸有其書、何獨捨諸、深所未曉、歷觀衆史、諸志列名、或前畧而後詳、或古無而今有、雖遍補所闕、各自以爲工、擁而論之、皆未得其最、蓋可以爲志者、其道有三焉、一曰都邑志、二曰氏族志、三曰方物志、何者、京邑翼翼、四方是則、千門萬戶、兆庶仰其威神、虎踞龍蹯、帝王表其尊極、兼復

土堦卑室好約者所以安人阿房未央窮奢者由其  
敗國此則其惡可以誡世其善可以勸後者也且宮  
闕制度朝廷軌儀前王所爲後王取則故齊府肇建  
誦魏都以立宮代國初遷寫吳京而樹闕故知經始  
之義卜揆之功經百王而不易無一日而可廢也至  
如兩漢之都咸洛晉宋之宅金陵魏徙伊瀍齊居漳  
滏隋氏二世分置兩都此並規模宏遠名號非一凡  
爲國史者宜各撰都邑志列於輿服之上金石草木  
縞紵絲枲之流鳥獸虫魚齒革羽毛之類或百蠻攸  
稅或萬國是供夏書則編於禹貢周書則託於王會

亦有圖形九牧之鼎、列狀四荒之經、觀之者擅其博學、聞之者騁其多識。自漢氏拓境、無國不賓、則有邛笮傳節、犂酏流味、犬宛獻其善馬、條支致其巨雀、爰及魏晉、迄于周隋、咸亦遐邇來王、任土作貢、異物歸於計吏、奇名顯於職方。凡爲國史者、宜各撰方物志、列於食貨之首。帝王苗裔、公侯子孫、餘慶所鍾、百世無絕、能言吾祖。郊子見師於孔公、不識其先、籍談取諄於姬后、故周撰世本、式辯諸宗。楚置三閭、實掌王族、逮乎晚葉、譜學尤煩。用之於官、可以品藻士庶、施之於國、可以甄別華夷。自劉曹受命、雍豫爲宅、世冒

相承子孫蕃衍及永嘉東渡流寓揚越代氏南遷夷  
從華夏於是中朝江右南北混淆華壤邊民虜漠相  
雜隋有天下文軌大同江外山東人物殷湊其間高  
門貴一作素族非復一家郡正州都世掌其任凡爲國  
史者宜各撰氏族志列於百官之下蓋自都邑已降  
氏族而往實爲志者所宜先而諸史竟無其錄如休  
文宋籍廣以符瑞伯起魏篇加之釋老徒以不急爲  
務曾何足云惟此數條粗加商畧得失利害從可知  
矣庶夫後來作者擇其善而行之

校十一字

風俗通周秦常以歲八月遣輜軒之使採異代方  
言還奏之永藏秘室

西京雜記揚子雲以爾雅孔子門人游夏之傳所記以解釋六藝者又張揖云昔在周公著爾雅一篇以釋其義

前漢書劉向集上古以來歷春秋六國至秦漢符瑞災異之記推跡行事著其占驗比類相從各有條目凡十一篇號曰洪範五行傳論

前漢書成帝令劉向校經傳諸子向卒向子奉車都尉歆卒父業于是總羣書奏爲七畧有集畧六藝畧諸子畧詩賦畧兵書畧術數畧方伎畧

漢魏春秋許負河內溫縣婦人漢高祖封爲明雌亭侯裴松之以高祖時封皆列侯未有鄉亭之爵疑此封爲不然

前漢書郊祀志武帝太初元年栢梁殿災越巫勇之曰越俗有火災復起屋必以大用勝服之于是作建章宮度爲千門萬戶前殿度高未央

吳錄諸葛亮觀秣陵山阜嘆曰鍾山龍盤石頭虎踞帝王之宅也

三輔舊事始皇阿房宮東西三里南北五百步庭中可受十萬人

前漢書高祖七年蕭何治未央宮上見其壯麗甚

怒何曰天子以四海爲家非壯麗無以重威且令後世無以加也

帝王世紀漢都長安東觀漢記光武中興都洛陽晉書晉都洛陽東晉都建業魏書元魏據有中原初都代孝文帝徙都洛陽北齊書高洋以鄴爲上都晉陽爲下都隋書高祖都長安煬帝遷洛陽于故周之王城南對伊闕卽今東都城

春秋左傳宣公三年王孫滿對楚子曰昔夏之方有德也遠方圖物貢金九牧鑄鼎象物百物而爲之備使民知神奸故民入川澤山林不逢不若魑魅魍魎莫能逢之用能協于上下以承天休

山海經大荒東經大荒南經大荒西經大荒北經前漢書元狩元年張騫言使大夏時見蜀布邛竹杖問所從來曰從東南身毒國可數千里得蜀賈人市于是天子令吳越人十餘輩出西南夷求之前漢書建元六年王恢擊東粵因兵威使番禺令唐蒙風曉南粵南粵食蒙蜀笥蒙問所從來曰道西北牂柯江出番禺城下蒙問蜀賈人多持竊出市夜郎夜郎卽臨牂柯江足以行船南粵蒙乃上書通夜郎道

前漢書大宛有善馬天子聞之甘心持千金及金馬以請大宛不肯予漢于是以李廣利爲貳師將軍往擊之大宛恐乃出其馬令漢自擇之前漢書條支國臨西海有大鳥卵如甕又大宛諸國發使隨漢使觀漢廣大以大鳥卵及犂靬眩人獻于漢

春秋左傳昭公十七年鄭子來朝昭子問焉曰少皞氏以鳥名官何故也鄭子曰吾祖也我知之少昊摯之立也鳳鳥適至故紀于鳥爲鳥師而鳥名仲尼聞之見鄭子而學之

春秋左傳昭公十五年晉荀躒如周籍談爲介王曰諸侯皆有以鎮撫王室晉獨無有何也籍談對曰王靈不及其何以獻噐王曰叔氏而忘諸乎唐叔成王之母弟也其反無分乎昔而高祖孫伯鷹司晉之典籍以爲大政故曰籍氏及辛有之二子董之于是乎有董史女司典之後也何故忘之籍談不能對賓出王曰籍父其無後乎數典而忘其祖

史記注劉向云世本古史官明于古事者之所記也錄黃帝以來帝王諸侯及卿大夫系謚名號凡

十五篇

離騷序三閭之職掌王族三姓曰屈昭景屈原序其譜屬率其賢良以厲國士

晉書元帝永嘉初以安東將軍都督揚州鎮建業太興元年即位是爲東晉

魏書孝文以平城高寒而洛陽爲土中欲徙都恐臣下不從乃議大舉南伐齊至洛命營宅遂定都通志魏立九品置中正州大中正主簿郡中正功曹各有簿狀以備選舉晉宋齊梁皆因之

沈約宋書符瑞志三卷

魏收魏書釋老志第二十

薛史崔祖思傳齊武帝永明九年魏使蔣少游至崔元祖曰臣甥少游有班儒之巧今來必模寫宮掖未可令反上不從果圖畫而歸

或問曰子以都邑氏族方物宜各纂次以志名篇夫  
史之有志多憑舊說苟世無其錄則闕而不編此都  
邑之流所以不果列志也對曰按帝王建國本無恒  
所作者記事亦在相時遠則漢有三輔典近則隋有  
東都記於南則有宋南徐州記晉宮闕名於北則有  
洛陽伽藍記鄴都故事蓋都邑之事盡在是矣譜謀  
之作盛於中古漢有趙岐三輔決錄晉有摯虞氏族  
記江左有兩王百家譜中原有方思殿格蓋氏族之  
事盡在是矣自沈瑩著臨海水土周處撰陽羨土風  
厥類衆夥諒非一族是以地理爲書陸澄集而難盡

水經加注酈元編而不窮蓋方物之事盡在是矣凡此諸書代不乏作必聚而爲志奚患無文譬夫涉海求魚登山採木至於鱗介脩短柯條巨細蓋在擇之而已苟爲漁人匠者何慮山海之貧罄哉

校三字

文獻通考洛陽伽藍記元魏羊銜之撰陳氏曰銜之以爾朱之亂城郭丘墟追述斯記

後漢書趙岐字邠卿長陵人歷官太常著三輔典錄

晉書摯虞字仲治長安人歷官太常卿以漢末喪亂譜傳多失乃撰族姓昭穆記十卷

晉書周處字子隱陽羨人歷官御史中丞著陽羨土風記

南史陸澄字彥深吳郡人隆昌中歷官散騎常侍聚百六十家之說編而爲部謂之地里書後任隋又增澄書八十四家謂之地記

隋書經籍志宋南徐州記二卷山謙之撰百家集

譜十卷王儉撰百家譜三十卷王僧孺撰臨海水  
土物志一卷沈瑩撰通考水經四十卷漢桑欽撰  
後魏酈道元注

門人太康盧申校

丙子中秋第廿四泊舟無子磯偶聞  
同舟長洲王太守同邑錢越乙美  
仲和子旦芳男氏初釋米是日  
石允登家宿仍傳寺諸名曉痛飲  
至二唱濤聲澎湃月色照水

史通訓故卷之三終

史通訓故卷之四

論贊第九

春秋左氏傳每有發論假君子以稱之二傳云公羊子穀梁子史記云太史公旣而班固曰贊荀悅曰論東觀曰序謝承曰詮陳壽曰評王隱曰議何法盛曰述楊雄曰譔劉昫曰奏袁宏裴子野自顯姓名皇甫謐葛洪列其所號史官所撰通稱史臣其名萬殊其義一揆必取便於時者則摠歸論焉夫論者所以辯疑惑釋疑滯若愚智共了固無俟商榷丘明君子曰者其義實在於斯司馬遷始限以篇終各書一論必

理有非要、則強生其文、史論之煩、實萌於此、夫擬春秋以成史、持論尤宜闊畧、其有本無疑事、輒設論以裁之、此皆私徇筆端、苟銜文彩、嘉辭美句、寄諸簡冊、豈知史書之大體、載削之指、歸者哉、必尋其得失、考其異同、子長淡泊無味、承祚懦緩不切、賢才間出、隔世同科、孟堅辭惟溫雅、理多愜當、其尤美者、有典誥之風、翩翩弈弈、良可詠也、仲豫義理雖長、失在繁富、自茲已降、流宕忘返、大抵皆華多於實、理少於文、鼓其雄辭、誇其儷事、必擇其善者、則干寶、范曄、裴子野、是其最也、沈約、臧榮緒、蕭子顯、抑其次也、孫安、國都

無足採習鑿齒時有可觀若袁彥伯之務飾玄言謝  
靈運之虛張高論王卮無當曾何足云王劭志在簡  
直言兼鄙野苟得其理遂忘其文觀過知人斯之謂  
矣大唐修晉書作者皆當代詞人遠棄史班近宗徐  
庾夫以飾彼輕薄之句而編爲史籍之文無異加粉  
黛於壯夫服綺紈於高士者矣史之有論也蓋欲事  
無重出省文可知如太史公曰觀張良貌如美婦人  
耳項羽重瞳豈舜苗裔此則別加他語以補書中所  
謂事無重出者也又如班固贊曰萬石君之爲父浣  
衣君子非之楊王孫裸葬賢於秦始皇遠矣此則片

言如約而諸義甚備所謂省文可知也及後來讚語之作多錄紀傳之言其有所異唯加文飾而已至於甚者則天子操行具諸紀末繼以論曰接武前修紀論不殊徒爲再列馬遷自序傳後歷寫諸篇各敘其意既而班固變爲詩體號之曰述范曄改彼述名呼之以贊尋述贊爲例篇有一章事多者則約之以使少理小者則張之以令大名實多爽詳畧不同且欲觀人之善惡史之褒貶蓋無假於此然固之摠述合在一篇使其條貫有序歷然可閱蔚宗後書實同班氏乃各附本事書於卷末篇目相離斷絕失次而後

生作者不悟其非如蕭李南北史

蕭子顯李百藥

大唐新修

晉史皆依范書誤本篇終有贊夫每卷立論其煩已多而嗣論以贊爲贖彌甚亦猶文士製碑序終而續以銘曰釋氏演法義盡而宜以偈言苟撰史若斯難與議夫簡要者矣至若與奪乖宜是非失中如班固之深排賈誼范曄之虛美隗囂陳壽謂諸葛不逮管肅魏收稱爾朱可方伊霍或言傷其實或擬非其倫必備加擊難則五車難盡故畧陳梗槩一言以蔽之

北史劉昫字延明京武昭王徵爲儒林祭酒延明

以三史文煩著畧記百三十篇

晉書皇甫謐號玄晏先生葛洪號抱朴子

校二十一字

南史臧榮緒東莞莒人齊高帝爲揚州刺史徵爲主簿不就括東西晉爲一書紀錄志傳百一十卷

晉書習鑿齒字彥威襄陽人歷官衡陽太守著魏晉陽秋四十七卷

宋書謝靈運陽夏人襲封康樂公入宋拜秘書監著晉書三十六卷

陳書徐陵字孝穆東海鄭人歷官侍中氣局深遠爲一代文宗

周書庾信字子山新野人梁元帝除爲中丞入周歷開府儀同三司

前漢書石建白首萬石君尚無恙每洗沐歸取親中帟廁踰身自浣洒

前漢書楊王孫孝武時人病且終令其子曰吾欲裸槨以逐吾真死則以布囊盛尸入地七尺既下從足引脫其囊以身親土祁侯以書諫之不聽唐書李百藥字重規定州人貞觀六年拜中書舍人

前漢書賈誼贊賈生欲改定制以漢爲土德色尚黃數用五及欲試屬國施三表五餌以係單于其術固以疎矣

後漢書隗囂字季孟成紀人聞王莽敗乃起兵公  
孫述以囂爲寧朔王爲漢所困病死論云若囂命  
會符運敵非天力雖坐論西伯豈多啗乎  
三國志諸葛傳評諸葛亮可謂識治之良才管蕭  
之亞匹

魏書爾朱榮字天寶北秀容人歷官大都督以驕  
橫爲莊帝所誅贊云向使榮無奸忍之失脩德義  
之風則韓彭伊霍夫何足數乎

## 序例第十

孔安國有云、序者、所以序作者之意也、竊以書列典、謨詩含比興、若不先敘其意、難以曲得其情、故每篇有序、敷暢厥義、降逮史漢、以記事爲宗、至於表志雜傳、亦時復立序、文兼史體、狀若子書、然可與誥誓相參、風雅齊列矣、逮華嶠、後漢多同班氏、如劉平江革等傳、其序先言孝道、次述毛義養親、此則前漢王貢傳體、其篇以四皓爲始也、嶠言辭簡質、敘致溫雅、味其宗旨、亦孟堅之亞歟、爰洎范曄、始革其流、遺弃史才、矜銜文彩、後來所作、他皆若斯、於是遷固之道、忽

諸微婉之風替矣。若乃后妃列女、文苑儒林、凡此之流，范氏莫不列序。夫前史所有，而我書獨無，世之作者，以爲耻愧，故上自晉宋，下及陳隋，每書必序課成其數，蓋爲史之道，以古傳今，古既有之，今何爲者？濫觴肇跡，容或可觀，累屋重架，無乃太甚。譬夫方朔始爲客難，續以賓戲，解嘲枚乘，首唱七發，加以七章七辨，音辭雖異，旨趣皆同。此乃讀者所厭聞，老生之恒說也。夫史之有例，猶國之有法，國之無法，則上下靡定，史之無例，則是非莫准。昔夫子脩經，始發凡例，左氏立傳，顯其區域，科條一辯，彪炳可觀。降及戰國，迄

乎有晉年逾五百、史不乏才、雖其體屢變而斯文終絕、惟今升先覺、遠述丘明、重立凡例、勒成晉紀、鄧孫已下、遽躡其蹤、史例中興、於斯爲盛、若沈宋之志序、蕭齊之序錄、雖皆以序爲名、其實例也、必定其臧否、徵其善惡、于寶范曄理切而多功、鄧粲道鸞詞煩而寡要、子顯雖文傷蹇、躡而義甚優長、斯一二家皆序例之美者、夫事不師古、匪說攸聞、苟模楷曩賢、理非可諱、而魏收作例、全取蔚宗貪天之功、以爲己力、異夫范依叔駿、班習子長、攘袂公行、不陷穿窬之罪也、蓋凡例既立、當與紀傳相符、案唐朝晉書例云、凡天

子廟號惟書於卷末依檢孝武崩後竟不言廟曰烈宗又案百藥齊書例云人有本字行者今並書其名依檢如高慎斛律光之徒多所仍舊謂之仲密明月此並非言之難行之難也及晉齊史例皆云坤道卑柔中宮不可爲紀今編同列傳以戒牝雞之晨竊惟錄皇后者既爲傳體自不可加以紀名二史之后爲傳雖云允愜而解釋非理成其偶中所謂畫蛇而加足反失杯中之酒也至於題目失據褒貶多違斯並散在諸篇此可得而畧矣

校七字

後漢書江革字次翁臨淄人客下邳裸跣行傭以供母鄉里稱之曰江巨孝建初中拜諫議大夫

前漢書東方朔上書陳農戰強國之計指意放蕩終不見用因著論設爲客難已用位卑以自慰喻後漢書班固自以二世才術位不過郎感東方朔揚雄自論以不遭蘇秦范蔡之時作賓戲以自通前漢書揚雄以時方丁傅董賢用事諸附之者或起家至二千石時雄方草太玄有以自守泊如也人嘲雄以玄之尚白而雄解之號曰解嘲前漢書枚乘字叔淮陽人景帝時爲弘農都尉著七發文心雕龍七發者七竅所發發乎嗜欲始邪歸正所以戒膏粱之子也張衡著七辨南史檀道鸞字萬安高平金鄉人位國子博士有文學撰續晉陽秋二十卷

晉書孝武諱曜字昌明簡文第三子廟號烈宗齊書高慎字仲密渤海蓆人歷位大將軍

齊書斛律光字明月勅勒部人金之子也仕齊歷官左丞相爲祖珽等譖誅

戰國策楚有祠者賜其舍人酒一卮舍人請各畫地爲蛇先成者飲一人先成引酒且飲之曰吾能爲之足爲足未成一人之蛇後成奪其卮曰蛇固無足遂飲其酒爲蛇足者終亡其酒

身通訓古

卷之四

三

身通訓古卷之四

身通訓古卷之四

題目第十一

上古之書有三墳五典八索九丘其次有春秋尚書  
禱杌志乘自漢已下其流漸繁大抵史名多以書記  
紀畧爲主後生祖述各從所好沿革相因循環遞習  
蓋區域有限莫踰於此焉至孫盛有魏氏春秋孔衍  
有隋尚書陳壽王劭曰志何之元劉璠曰典此又好  
奇厭俗習舊捐新雖得稽古之宜未達從時之義推  
而論之其編年月者謂之記列紀傳者謂之書取順  
於時斯爲最也夫名以定體爲實之賓苟失其途有  
乖至理按呂陸二民不常各著一書惟次篇章不

繫時月此乃子書雜記而皆號曰春秋魚豢姚察著  
魏梁二史巨細畢載蕪累甚多而俱勝之以畧考名  
責實奚其爽歟若乃史傳雜篇區分類聚隨事立號  
諒無恒規如馬遷撰皇后傳而以外戚命章按外戚  
憑皇后以得名猶宗室因天子而顯稱若編皇后而  
曰外戚傳則書天子而曰宗室紀可乎班固撰人表  
以古今爲目尋其所載也皆自秦而往非漢之事古  
誠有之今則安在子長史記別剗八書孟堅旣以漢  
爲書不可更標書號改書爲志義在互文而何氏中  
興易志爲記此則貴於革舊未見其能取新夫戰爭

方殷雄雌未決則有不奉正朔自相君長必國史爲傳宜別立科條至如陳項諸雄寄篇漢籍董袁群賊附列魏志既同臣子之例孰辨彼此之殊惟東觀以平林下江諸人列爲載記顧後來作者莫之遵効逮新晉始以十六國主特載記表名可謂擇善而行巧於師古者矣觀夫舊史列傳題卷靡恒文少者則具出姓名若司馬相如東方朔是也字煩者惟書姓氏若毋將蓋陳衛諸葛傳是也必人多而姓同者則結定其數若二袁四張二公孫傳是也如此標格足爲詳審至范曄舉例始全錄姓名歷短行於卷中叢細

字於標外、其子孫附出者、注於祖先之下、乃類俗之文案、孔目、藥草經方、煩碎之至、孰過於此、竊以周易六爻、義存象內、春秋萬國、事具傳中、讀者研尋篇終、自曉何必開帙解帶、便令昭然滿目也、自茲已降、多師蔚宗、魏收因之、則又甚矣、其有魏世隣國、編於魏史者、於其人姓名之上、又列之以邦域、申之以職官、至如江東帝王、則云僭晉司馬睿、島夷劉裕、河西酋長、則云私置涼州牧張寔、私署涼王李暠、此皆篇中所具、又於卷首具列、必如收意、使其撰兩漢書、三國志、題諸盜賊傳、亦當云、僭西楚項羽、僞寧朔王隗囂、

自餘陳涉張步劉璋袁術其位號皆一一具言無所  
不盡也蓋法令滋章古人所慎若范魏之裁篇目可  
謂滋章之甚者乎苟忘彼大體好茲小數難與議夫  
婉而成章一字以爲褒貶者矣

校十七字

孔安國書序伏犧神農黃帝之書謂之三墳言大  
道也少昊顓頊高辛唐虞之書謂之五典言常道  
也八卦之說謂之八索求其義也九州之志謂之  
九丘丘聚也

周書劉璠字寶義沛人初爲宜豐侯蕭修主簿入  
周歷官黃門侍郎著梁典三十卷未及刊定而卒

子祥勒成一家行于世

陳書姚察吳興人陳永定中歷官吏部尚書入隋  
著梁略

後漢書董卓字仲穎臨洮人歷官前將軍爲王允  
所誅

後漢書袁紹字本初汝陽人董卓時拜渤海太守

起兵誅卓尋兼興并青幽四州爲魏武所敗病死  
後漢書王莽時南方饑饉更相侵奪新市人王匡  
王鳳爲平理爭訟衆共推爲渠帥于是亡命馬武  
等共往從之攻離鄉聚藏綠林中至有五萬餘口  
疾疫起乃散去王成等入南郡號下江兵王鳳馬  
武及其黨朱鮪張卬等入南陽號新市兵平林人  
陳牧廖湛亦聚千餘人號平林兵以應之  
晉書元帝諱睿琅邪王觀之子愍帝崩卽位建康  
廟號中宗

宋書劉裕字德裕彭城人受晉禪廟號高祖

晉書張寔字安遜軌之子軌卒凉州人推寔攝位  
進凉州牧封西平公

晉書李暠字玄感成紀人隆安中衆推爲凉公卒  
國人謚曰武昭王

後漢書張步字文公琅邪人漢兵起亦聚衆自號  
五威將軍降世祖封安丘侯後復逃欲入海被誅  
蜀志劉璋字季玉焉之子襲焉位爲蜀益州牧寬  
柔無威昭烈襲之遷璋于公安

後漢書袁術字公路司空逢之子董卓時爲後將  
軍後僭號自稱仲家爲魏武所困憤恚死

斷限第十二

夫書之立約其來尚矣如尼父之定虞書也以舜爲始而云粵若稽古帝堯丘明之傳魯史也以隱爲先而云惠公元妃孟子此皆正其疆里開其首端因有沿革遂相交互事勢當然非爲濫軼也過此已往可謂狂簡不知所裁者焉又子曰不在其位不謀其政若漢書之立表志其殆侵官離局者乎考其濫觴所出起乎司馬氏按馬記以史制名班書持漢標目史記者載數千年之事無所不容漢書者紀十二帝之時有限斯極固旣分遷之記判其去取紀傳所存惟

留漢目表志所錄乃盡犧年舉一反三豈不若是膠柱調瑟不亦繆歟但固之踳駁既往不諫而後之作者咸習其迷宋史則上括魏朝隋書則仰包梁代求其所書之事得十一於千百一成其例莫之敢移永言其理可爲歎息當魏武乘時撥亂電掃羣雄鋒鏑之所交網羅之所及者蓋惟二袁劉呂而已至進鵠行弑燃臍就戮摠關王室不涉霸圖而陳壽國志引居傳首夫漢之有董卓猶秦之有趙高昔車令之誅既不列漢史何太師之斃遂獨刊於魏書乎兼復臧洪陶謙劉虞孫瓚生於季末自相吞噬其於曹氏也

非唯理異犬牙固亦事同風馬漢典所具而魏冊仍  
編豈非流宕忘歸迷而不悟者也亦有一代之史上  
下相交若已見它記則無宜重述故子嬰降沛其詳  
取驗於秦紀伯符死漢其事斷入於吳書沈錄金行  
上羈劉主魏刊水運下列高王惟蜀與齊各有國史  
越次而載孰曰攸宜自五胡稱制四海殊宅江左既  
承正朔斥彼魏胡故氏羌有錄索虜成傳魏本出於  
雜種竊亦自號真君其史黨附本朝思欲凌駕前作  
遂乃南籠典午北吞諸僞比於群盜盡入傳中但當  
有晉元明之時中原秦趙之代元氏膜拜稽首自同

臣妾而反列之於傳何厚顏之甚邪又張李諸姓據有京蜀其於魏也校年則前後不接論地則參商有殊何預魏氏而橫加編載夫尚書者七經之冠冕百氏之襟袖凡學者必先精此書次覽羣籍譬夫行不由徑非所聞焉脩國史者若旁採異聞用成博物斯則可矣如班書地理志首遂全寫禹貢一篇降爲後書持續前史蓋以水濟水床上施床徒有其煩竟無其用豈非惑乎昔春秋諸國賦詩見意左氏所載惟錄其章名如地理爲書論自古風俗至於夏世宜云禹貢已詳何必重述古文益其辭費也若夷狄本係

種落所興、北貊起自淳維、南蠻出於盤瓠、高句麗以  
鰲橋獲濟、吐谷渾因馬闡徙居、諸如此說者、求之歷  
代、何書不有、而作之者、曾不知前撰已著、而後修宜  
輟、遂乃百世相傳、一字無改、蓋駢指在手、不加力於  
千鈞、附贅居身、非廣形於七尺、爲史之體、有若於斯  
苟濫引它事、豐其部帙、以此稱博、異乎吾黨之所聞  
陸士衡有云、雖有愛而必捐、善哉斯言、可謂達作者  
之致矣、夫能明彼斷限、定其折中、歷選自古、惟蕭子  
顯近諸、然必謂都無其累、則吾未許也、

校八字

春秋左傳惠公元妃孟子卒繼室以聲子生隱公  
魏志劉表字景升高平人歷官荊州牧魏武與袁

紹相持官渡紹遣人求助表許之而不至亦不佐  
魏武建安十三年魏武征表未至表病死

魏志呂布字奉先九原人封溫侯建安三年魏武  
困布于下邳獲布殺之

後漢書董卓將兵入京廢少帝爲弘農王遷何太

后于永安宮遂以弑崩聞東方兵起卓乃鸛殺弘

農王徙都長安後爲王允等所誅尸于市天時始

熱卓素充肥脂流于地守尸吏燃火置卓臍中光

明達曙如是積日

史記趙高者諸趙遠屬也高昆弟數人皆生隱宮

秦王聞高彊力通于獄法舉以爲中車府令後爲

子嬰所誅

魏志臧洪字子源廣陵人初爲張超功曹袁紹以

洪領青州刺史魏武破張超于雍丘洪向紹請兵

不聽由是怨之與紹絕紹執而殺之

魏志陶謙字恭祖丹陽人任徐州刺史曹操父嵩

避難琅邪謙別將守陰平士卒利嵩財寶遂襲殺

之興平中操擊謙謙欲走丹陽會病死

魏志劉虞字伯安東海郟人任幽州牧爲公孫瓚

所執殺之

魏志公孫瓚字伯珪遼西令支人靈帝時拜降虜校尉後爲袁紹所敗自焚死

史記子嬰爲秦王四十六日沛公破秦軍至霸上使人約降子嬰即係頸以組白馬素車奉天子璽符降軹道旁

吳志孫策字伯符魏武表爲討逆將軍封吳侯爲故吳郡太守許貢客所殺

晉書載記前秦苻洪洪臨渭氏也後秦姚弋仲弋仲羌也宋書有索虜傳謂托跋魏也

魏書世祖太武皇帝托跋肅改元太平真君晉書元帝崩明帝嗣位帝諱紹字道幾元帝太子

載記前趙劉元海後趙石勒涼張軌蜀李特史記匈奴其先祖夏后氏之苗裔也曰淳維張晏

云淳維以殷時奔北邊後漢書昔高辛氏有犬戎之寇募能得犬戎之將

吳將軍頭者妻以少女帝有畜狗曰槃瓠街人頭造闕下診之則吳將軍也帝不得已以女配之槃

瓠得女負入南山生六男六女其後滋蔓號曰蠻夷

魏志高句麗者出于夫餘自言先祖朱蒙其俗言

朱蒙者善射也夫餘之臣欲殺之朱蒙避難道遇大水得魚鰲成橋以濟遂至紇升骨城居焉號高句麗以高爲氏

魏書吐谷渾遼東鮮卑也初奕洛韓二千妻長曰吐谷渾嬀曰若洛麗爲二部馬闕相傷麗奔渾曰闕在于馬乃怒及人耶乖別甚易去汝萬里遂擁馬西行西附陰山

文選陸機文賦苟傷廉而愆義亦雖愛而必損

編次第十三

昔尚書記言、春秋記事以日月爲遠近年世爲前後、  
用使閱之者、鴈行魚貫、皎然可尋、至馬遷始錯綜成  
篇、區分類聚、班固踵武、仍加祖述於其間、則有統體  
不一、名目相違、朱紫以之混淆、冠屨於焉顛倒、蓋可  
得而言者矣、尋子長之列傳也、其所編者、惟人而已  
矣、至於龜筮異物、不類肖形、而輒與黔首同科、俱謂  
之傳、不其恠乎、且龜筮所記、全爲志體、向若與八書  
齊列、而定以書名、庶幾物得其朋、同聲相應者矣、孟  
堅每一姓有傳、多出附餘觀一作親其事跡尤異者、則

分入它部、故博陸去病、昆弟非復一篇、外戚元后婦  
始分爲二錄、至如元王受封於楚、至孫戊而亡、案其  
行事、所載甚寡、而能獨載一卷者、實由向歆之助耳、  
但交封漢始地、啟列藩、向居劉末、職才卿士、昭穆既  
疎、家國又別、適使分楚王子孫於高惠之世、與荆代  
並編、析劉向父子於元成之間、與王京共列、方於諸  
傳、不亦類乎、又自古王室雖微、天命未改、故臺名逃  
債、尚曰周王君、未繫頸、且云秦國、况神璽在握、火德  
猶存、而居攝建年、不編平紀之末、孺子主祭、咸書莽  
傳之中、遂令漢餘數歲、湮沒無覩、求之正朔、不亦厚

誣當漢氏之中興也、更始升壇改元、寒暑三易、世祖稱臣北面、誠節不虧、既而兵敗長安、祚歸高邑、兄亡弟及、歷數相承、作者乃抑聖公於傳內、登文叔於紀首、事等躋僖、位先不窋、夫東觀秉筆、容或諂於當時、後來所脩、理當刊革者也、蓋逐兔爭捷、瞻烏靡定、群雄僭盜、爲我駟除、是以史傳所分、真僞有別、陳勝項籍、見編於高祖之後、隗囂孫述、不列於光武之前、而陳壽蜀書、首標二牧、次列先主、以繼焉、璋豈以蜀是僞朝、遂乃不遵恒例、但鵬鷄一也、何大小之異哉、春秋嗣子、諒闇未踰年而廢者、既不成君、故不別加篇

目是以魯公十二惡視不預其流及秦之子嬰漢之  
昌邑咸亦因胡亥而得記附孝昭而獲聞而吳均齊  
春秋乃以鬱林爲紀事不師古何滋章之甚與觀梁  
唐二朝撰齊隋兩史東昏猶在而遽列和年煬帝未  
終而已編恭紀原其意旨豈不以和爲梁王所立恭  
乃唐氏所承所以黜永元而尊中興顯義寧而隱大  
業苟欲取悅當代遂乃輕侮前朝行之一時庶叶權  
道播之千載未爲格言

尋夫本紀所書資傳乃顯表志異體必不相涉舊史  
以表志之帙分於紀傳之間降及蔚宗肇加釐革沈

魏繼作相與因循既而子顯齊書頴達隋史不依范  
例重遵班法蓋擇善而行何有遠近聞義不徙是吾  
憂也若乃先黃老而後六經後外戚而先夷狄老子  
與韓非並列賈誼將荀彧同編孫弘傳讚宜居宣武  
紀末宗廟迭毀枉入玄成傳終如斯舛謬不可勝紀  
今畧具尤甚者耳故不復一一而詳之

校入字

前漢書霍中孺以縣吏給事平陽侯家與侍者衛  
少兒私通生去病吏畢歸家娶婦生光光歷大將  
軍封博陸侯去病封冠軍軍侯

前漢書孝宣王皇后奉光女召入宮稍進爲婕妤  
宣帝以許太子早失母乃立婕妤爲后封父奉光  
爲邛成侯太子立爲元帝元帝后成帝母亦王氏  
故號太后爲邛成太后事具外戚傳孝元皇后王  
莽之姑也生成帝邛成太后之婦也自有傳

前漢書劉交以高祖六年封爲楚王謚元元王子  
富封休侯楚王戊反富失侯後聞數諫戊乃更封  
爲紅侯富子辟疆辟疆子德德子向向子歆  
帝王世紀報王名誕雖居天子之位與家人無異  
負債於民無以得歸乃上臺避之故周人名其臺  
曰逃債臺

前漢書平帝崩王莽立廣戚侯子嬰年二歲太保  
舜等請莽稱攝以重其權太后許之明年改元曰  
居攝

後漢書劉玄字聖公光武族兄也地皇四年平林  
人陳牧等與光武破王莽前隊大夫甄阜等號聖  
公爲更始將軍二月立爲天子建元更始以光武  
爲太常偏將軍立三年爲赤眉所殺  
後漢書建武元年諸將上尊號命有司設壇場于  
鄴南六月己未光武卽皇帝位改鄴爲高邑是年  
十二月赤眉殺更始

春秋左傳文公二年八月有事于太廟躋僖公逆  
祀也君子以爲失禮子雖齊聖不先父食久矣故  
禹不先鯀湯不先契文武不先不密宋祖帝乙鄭  
祖厲王猶上祖也注僖嘗爲閔臣今居上故曰逆

祀

後漢書公孫述字子陽茂陵人王莽時爲導江卒  
正居臨邛更始兵起自立爲蜀王後爲吳漢等所  
滅

蜀志劉馬字君郎竟陵人侍中璽扶謂馬曰京師  
將亂益州分野有天子氣會并梁皆殺刺史馬謀  
得爲監軍領益州牧馬卒子璋襲位爲昭烈所襲  
春秋起隱公桓公莊公閔公僖公文公宣公成公  
襄公昭公定公終哀公

史記胡亥始皇之少子也始皇崩趙高矯詔立之  
爲閭樂所弑子嬰立子嬰二世之兄子也立四十  
六日而降于沛公

前漢書昭帝崩無嗣霍光徵昌邑王賀典喪卽位  
二十七日行淫亂乃廢之

齊書廢帝鬱林王諱昭業字元尚文惠太子長子  
也武帝崩以皇太孫卽位隆昌中爲西昌侯蕭鸞  
所廢封爲鬱林王

齊書廢帝東昏侯諱寶卷字智藏明帝第二子卽  
位改元永元蕭衍等廢之封爲東昏侯立和帝改  
永元三年爲中興

北史煬帝大業十三年唐公入京師遜尊帝爲太上皇立代王侑爲皇帝改元義寧

前漢書公孫弘傳贊漢興六十餘載群士嚮慕異人並出斯亦曩時版築飯牛之朋已孝宣招選茂異參其名臣亦其次也

前漢書常玄成字少翁元帝永光中代于定國爲丞相永光四年與御史大夫鄭弘等定宗廟迭毀之議

前漢書第六十四卷匈奴至六十六卷西域第六十七卷外戚史記第三卷老莊申韓

魏志荀彧荀攸賈詡傳第十彧字文若潁川潁陰人歷官尚書令以魏武九錫事異議以憂薨詡字文和武威姑臧人董卓敗詡勸李傕郭汜西攻長安後歸魏歷官大尉

稱謂第十四

孔子曰、唯名不可以假人、又曰、名不正、則言不順、云云、必也正名乎、是知名之折中、君子所急、况復列之篇籍、傳之不朽者耶、昔夫子脩春秋、吳楚稱王、而仍舊曰子、此則褒貶之大體、爲前脩之楷式也、馬遷撰史記、項羽僭盜而紀之曰王、此則真僞莫分、爲後來所惑者也、自茲已降、訛謬相因、名諱所施、輕重莫等、至如更始中興漢室、光武所臣、雖事業不成、而歷數終在、班范二史、皆以劉玄爲目、不其慢乎、古者二國爭盟、晉楚並稱侯伯、七雄力戰、齊秦俱曰帝王、其間

雖勝負有殊、大小不類、未聞勢窮者即爲匹庶、力屈

者乃成寇賊、至於近古則不然、當漢氏云亡、天下鼎

峙、論王道則曹逆而劉順、語國祚則魏促而吳長、但

以地處函夏、人傳正朔、度長挈大、魏實居多、二方之

於上國、亦猶秦繆楚莊、與文襄而並霸、蜀昭烈王可比秦繆公吳

大帝可比楚莊王逮作者之書事也、乃沒吳蜀號謚、呼權備

姓名、謂魚豢孫盛等方於魏邦、懸隔頓爾、懲惡勸善、其義安

歸、續以金行版蕩、戎羯稱制、各有國家、實同王者、晉

世臣子、黨附君親、嫉彼亂華、比諸群盜、此皆苟徇私

忿、忘夫至公、自非坦懷愛憎、無以定其得失、至蕭方

等始存諸國名謚、僭帝者皆稱之以王、此則趙猶人  
君、加以王號、杞用夷禮、貶同子爵、變通其理事、在合  
宜、小道可觀、見於蕭氏者矣、古者天子廟號、祖有功  
而宗有德、始自三代、迄于兩漢、名實相允、今古共傳、  
降及曹氏、祖名多濫、必無慚德、其惟武王故、陳壽國  
志、獨呼武曰祖、至於文明、但稱帝而已、自晉已還、竊  
號者非一、如康穆兩帝、劉蕭二明、梁簡文兄弟、兼爲孝元  
帝齊武成昆季、兼言宣孝昭也斯或承家之辟王、或亡國之  
庸主、不謚靈繆爲幸已多、猶曰祖宗、孰云其可、而史  
臣載削、曾無辨明、每有所書、必存廟號、何以申勸沮

之義杜淪濫之源者乎、又位乃人臣、跡參王者、如周之亶父、季歷、晉之仲達、師昭、追尊建名、比諸天子、可也、必若當塗所出、宦官携養、帝號徒加人、望不愜、故國志所錄、無異匹夫、應書其人、直云皇之祖考而已、至如元氏起於沙朔、其君乃一部之酋長耳、道武追崇所及、凡二十八君、自開闢以來、未之有也、而魏書序紀襲其虛號、生則謂之帝、死則謂之崩、何異沐猴而冠、腐鼠稱璞者矣、夫歷觀自古、稱謂不同、緣情而作、本無定准、至若諸侯無謚者、戰國已上、謂之今王、天子見出者、漢魏已後、謂之少帝、周衰有共和之相、

楚弑有夾敖之主、趙佗而曰尉佗、英布而曰黥布、豪傑則平林新市、寇賊則黃巾赤眉、園綺友朋共云四皓、奮建父子都稱萬石、皆出於當代、史臣編錄、無復弛張、蓋取叶隨時、不藉稽古、及後來作者、頗慕斯流、亦時採新名、列成篇題、音第若王晉之十士、寒雋、沈宋之二凶、索虜、卽其事也、唯魏收遠不師古、近非因俗、自我作故、無所憲章、其撰書也、乃以平陽王爲出帝、司馬氏爲僭晉、桓劉已下、通曰、島夷夫其諂齊、則輕抑關右、黨魏則深誣江外、愛憎出於方寸、與奪由其筆端、語必不經名、惟駭物、昔漢世原涉、大脩墳墓、乃

開道立表、署曰南陽阡、欲以繼跡京兆、齊聲曹尹、而人莫之肯從、但云原氏阡而已、故知事非允當、難以遵行、如收之、苟立詭名、不依故實、雖復刊諸竹帛、終罕傳於諷誦也、抑又聞之、帝王受命、歷數相承、雖舊君已沒、而致敬無改、豈可等之凡庶、便書之以名者乎、近代文章、實同兒戲、有天子而稱諱者、若姬滿、劉莊之類是也、有匹夫而不名者、若步兵、彭澤之類是也、史論立言、理當雅正、如班述之敘聖卿也、而曰董公、惟亮、范贊之言季孟也、曰隗王、得士、習談、漢王、則謂昭烈爲玄德、習氏漢晉春秋以蜀爲正統、其編敘事皆謂蜀先主爲昭烈帝、至於論中

語則呼裴引魏室則目文帝為曹丕夫以淫亂之臣

忽一作隱其諱淫謂董賢正朔之后乃呼其名意好

奇而輒為文逐韻而便作班固哀紀贊曰婉嬖董公

贊曰公孫習用捨之道其例無恒近代為史通多此

失上才猶其若是而况中庸者乎今畧舉一隅以存

標格云爾校四十字

史記六國年表周赧王二十七年秦昭王自立為

西帝齊湣王立為東帝已而復為王

春秋提要五霸齊桓公莊公十三年會北杏宋襄

公晉文公僖公二十八年戰城濮秦穆公文公三

年伐晉楚莊王宣公十一年盟辰陵

南史忠烈世子蕭方等字實相梁元帝長子也撰

三十國春秋行于世

春秋左傳僖公二十七年春杞桓公來朝用夷禮

故曰子公卑祀祀不共也

魏志曹操追謚武皇帝廟號太祖曹丕謚文皇帝

廟號高祖曹叡謚明皇帝廟號烈祖

晉書康帝諱岳字世同成帝母弟在位二年崩無

廟號穆帝諱聃字彭祖康帝子也年十九崩廟號

孝宗

宋書明帝劉彧字景休小字榮期文帝第十一子

廟號太宗

齊書蕭鸞字景栖始安貞王道生之子小字玄度

廢海陵而自立廟號高宗

梁書簡文帝諱綱字世纘武帝第三子昭明太子

薨立爲太子嗣位之後侯景制命期年遇弒廟號

太宗元帝諱繹字世誠武帝第七子侯景反遣王

僧辯討誅之即位于江陵西魏見伐兵敗出降爲

梁王督所害廟號世祖

北齊書文宣帝高洋歡第二子受魏禪立四年崩

廟號顯祖孝昭帝高演神武第六子文宣之母弟

也立二年崩無廟號武成帝高湛神武第九子也

立四年禪于太子緯廟號世祖

史記公叔祖類卒于古公賈父立後追尊曰太王

古公卒季歷立後追尊曰王季

晉書司馬懿字仲達仕魏爲相國武帝受禪追尊  
宣皇帝廟號高祖子師字子元追尊景皇帝廟號  
世宗昭字子上景帝母弟也追尊文皇帝廟號太  
祖

後漢書袁術少見識書言代漢者當塗高自云名  
字應之章懷太子注云當塗高者魏也

後漢書袁紹檄州郡文司空曹操祖父中常侍騰  
與左悺徐璜並作妖孽父嵩乞丐携養因賊假位  
魏書太祖道武皇帝諱珪以天興元年卽帝位追  
尊成帝已下及后號謚至昭成帝什翼健凡二十  
七君

史記厲王出居于彘也召公周公二相行政號曰  
共和

春秋左傳昭公元年楚公子圍將聘于鄭未出境  
聞王有疾而還十一月己酉圍至入問王疾縊而  
殺之葬于郊謂之郊敖楚人謂未成君者爲敖  
史記南越王尉佗者真定人也姓趙氏秦時爲南  
海龍川令南海尉任囂病且死被佗書行南海尉  
事秦威乃自立爲南越武王

史記黥布者六人也姓英氏秦時爲布衣少年有客相之曰當刑而王及壯坐法黥布欣然笑曰人相我當刑而王幾是乎後從高祖定天下封淮南王

後漢書靈帝中平元年二月鉅鹿人張角自稱黃天其部師有三十六萬皆着黃巾同日反叛後漢書樊崇等衆既寢盛聞王莽遣太師王匡等討之恐其衆與莽兵亂乃皆朱其眉以相識別號曰赤眉

前漢書萬石君名奮其父趙人也姓石氏孝文時積功勞至太中大夫恭謹無與比長子建次子甲次子乙次子慶皆以馴行孝謹官皆至二千石于是景帝曰石君及四子皆二千石人臣尊寵乃集其門號奮爲萬石君

沈約宋書二凶傳太子劭與始興王濬弒文帝事也又索虜傳索頭虜者姓託跋氏其先漢將李陵後也謂元魏事

魏書出帝諱脩廣平王懷之第三子廢帝請遜大位高歡乃迎脩立之後西奔爲西魏又僭晉司馬叡傳島夷桓玄傳島夷劉裕傳